

**CONVENIO DE COLABORACIÓN ENTRE O CONCELLO DE SANTIAGO DE
COMPOSTELA E A ASOCIACIÓN GALLEGA DE PERSONAS CON ENFERMEDADES
ONCOHEMATOLÓGICAS-ASOTRAME GALICIA**

REUNIDOS

Dunha parte,

Dona María Rozas Pérez, concelleira de Dereitos e Servizos Sociais, Promoción Económica e Xuventude do Concello de Santiago de Compostela, que actúa en nome e representación desta Corporación en virtude das competencias delegadas por Decreto da Alcaldía do 17 de xuño de 2023, ditado pola Excma. Sra. Alcaldesa-Presidenta, ao abeiro do disposto nos artigos 124 da Lei 7/1985, do 2 de abril, reguladora das bases do réxime local, e 61 da Lei 5/1997, do 22 de xullo, de Administración local de Galicia, con CIF P1507900G e domicilio na Praza do Obradoiro, s/n, 15705 Santiago de Compostela.

E doutra,

Dona....., que intervéen neste acto na súa condición de presidenta e representante legal da **Asociación Gallega de Personas con Enfermedades Oncohematológicas (ASOTRAME GALICIA)**, con NIF G-70370713 e domicilio social na rúa Chile, nº 2, entreplanta, porta dereita, 15404 Ferrol, entidade sen ánimo de lucro constituída no ano 2013 ao abeiro da lexislación reguladora do dereito de asociación, actuando de conformidade coas facultades que lle atribúe o artigo 31 dos seus estatutos, e inscrita no Rexistro Municipal de Asociacións do Concello de Santiago de Compostela co nº 695.

Ambas as partes, na representación que ostentan, recoñécense mutuamente capacidade legal suficiente para a formalización do presente convenio e, para tal efecto,

EXPOÑEN

Primeiro.

O Concello de Santiago de Compostela exerce, de conformidade co disposto nos artigos 25.2.e) e 26.1.c) da Lei 7/1985, do 2 de abril, reguladora das bases do réxime local, as competencias propias en materia de avaliación e información de situacións de necesidade social e de atención inmediata ás persoas en situación ou risco de exclusión social.

Así mesmo, a Lei 13/2008, do 3 de decembro, de servizos sociais de Galicia, recoñece o dereito das persoas aos servizos sociais e atribúe aos poderes públicos a responsabilidade de garantir a súa efectividade, promovendo a igualdade real e a inclusión social.

A citada lei establece, ademais, que os poderes públicos fomentarán o desenvolvemento de actuacións solidarias por parte das entidades de iniciativa social que cumpran os requisitos legalmente establecidos. Neste marco, corresponde aos concellos, entre outras funcións, a creación, xestión e mantemento dos servizos sociais comunitarios básicos, a colaboración no fomento dos servizos sociais especializados no ámbito local, así como a promoción e coordinación dos servizos sociais.

Segundo.

En cumprimento do mandato contido no artigo 9.2 da Constitución Española, o Concello de Santiago de Compostela promove as condicións para que a liberdade e a igualdade das persoas sexan reais e efectivas, removendo os obstáculos que dificulten a súa plenitude e favorecendo a participación da cidadanía na vida política, económica, cultural e social.

Neste marco, e no exercicio das competencias que lle corresponden en materia de servizos sociais, o Concello desenvolve programas e actuacións orientados á prevención das situacións de vulnerabilidade, á promoción da inclusión social e á mellora da calidade de vida das persoas, favorecendo a igualdade de oportunidades e a cohesión social.

Terceiro

A Asociación Gallega de Personas con Enfermedades Oncohematológicas (ASOTRAME GALICIA) é unha entidade sen ánimo de lucro constituída ao abeiro da Lei Orgánica 1/2002, do 22 de marzo, reguladora do dereito de asociación, con personalidade xurídica propia e plena capacidade de obrar.

A entidade desenvolve programas, servizos e actuacións dirixidos a mellorar a calidade de vida das persoas afectadas por enfermidades oncohematolóxicas, das persoas sometidas a transplante de medula ósea e das súas familias, proporcionando atención psicolóxica, social e de acompañamento durante o proceso da enfermidade.

Para o cumprimento dos fins recollidos nos seus estatutos, **ASOTRAME GALICIA** promove diferentes proxectos e actividades, todas elas orientadas á mellora da calidade de vida das persoas destinatarias e ao apoio integral das súas familias.

Cuarto.

De conformidade cos seus estatutos, a **Asociación Gallega de Personas con Enfermedades Oncohematológicas (ASOTRAME GALICIA)** ten entre os seus fins a promoción e defensa dos dereitos das persoas afectadas por enfermidades oncohematolóxicas, a mellora da súa calidade de vida e da das súas familias, a prestación de apoio social e sanitario, o desenvolvemento de actuacións de información, sensibilización e acompañamento, así como a promoción da investigación, do voluntariado e da colaboración coas administracións públicas e demais entidades que compartan estes obxectivos.

Os devanditos fins gardan unha relación directa co obxecto do presente convenio e co programa subvencionado, orientado á atención psicosocial das persoas afectadas por enfermidades oncohematolóxicas e das súas familias.

Quinto.

O Concello de Santiago de Compostela considera que a actividade desenvolvida pola **Asociación Gallega de Personas con Enfermedades Oncohematológicas (ASOTRAME GALICIA)** é de interese público e social, ao contribuír á mellora da calidade de vida das persoas afectadas por enfermidades oncohematolóxicas e das súas familias, mediante actuacións de apoio, acompañamento e atención especializada.

Neste contexto, e dada a traxectoria de colaboración existente entre ambas as entidades, considérase conveniente formalizar o presente convenio co fin de dar continuidade e estabilidade a esta colaboración institucional, reforzando a cooperación entre o Concello e a entidade para a consecución de obxectivos de interese público no ámbito dos servizos sociais.

Sexto.

A Asociación Gallega de Personas con Enfermedades Oncohematológicas (ASOTRAME GALICIA) é unha entidade con personalidade xurídica propia e plena capacidade de obrar, que desenvolve a súa actividade con plena autonomía funcional e organizativa respecto do Concello de Santiago de Compostela.

En consecuencia, a entidade asumirá a responsabilidade derivada da organización e execución das actuacións obxecto do presente convenio, sen que exista relación de dependencia respecto do Concello, que non responderá, nin directa nin subsidiariamente, dos danos e prexuízos de calquera natureza que poidan derivarse da realización das devanditas actuacións.

Sétimo.

De conformidade co artigo 2.1 da Lei 38/2003, do 17 de novembro, xeral de subvencións, a achega económica prevista no presente convenio ten a natureza xurídica de subvención, ao destinarse ao financiamento dunha actividade de utilidade pública e interese social, sen contraprestación directa por parte da entidade beneficiaria e condicionada ao cumprimento dos obxectivos e obrigas establecidos neste instrumento.

Así mesmo, de acordo co disposto no artigo 26 da Lei 9/2007, do 13 de xuño, de subvencións de Galicia, os convenios constitúen o instrumento habitual para formalizar as subvencións previstas nominativamente nos orzamentos das administracións públicas.

En consecuencia, e atendendo ao interese público e social das actuacións desenvolvidas pola **Asociación Gallega de Personas con Enfermedades Oncohematológicas (ASOTRAME GALICIA)**, ambas as partes acordan subscribir o presente convenio de colaboración para regular as condicións da subvención nominativa concedida polo Concello de Santiago de Compostela.

Oitava.

En n resposta ao requirimento efectuado polo Concello, a **Asociación Gallega de Personas con Enfermedades Oncohematológicas (ASOTRAME GALICIA)** presentou no Rexistro Xeral, con data 7 de maio de 2026 e número de entrada 2026027239, a documentación necesaria para a tramitación e formalización do presente convenio.

Unha vez revisada a documentación achegada e verificado o cumprimento dos requisitos esixidos pola normativa reguladora das subvencións, e estando prevista nominativamente nos Orzamentos Xerais do Concello de Santiago de Compostela para o exercicio 2026 unha subvención a favor da **Asociación Gallega de Personas con Enfermedades Oncohematológicas (ASOTRAME GALICIA)**, por importe de 3.000,00 €, con cargo á aplicación orzamentaria 020 23100 4800026, as partes acordan subscribir o presente convenio co fin de regular as condicións da colaboración e do financiamento municipal do programa obxecto do presente convenio, de interese público e social.

CLÁUSULAS

PRIMEIRA. OBXECTO

O presente convenio ten por obxecto regular os termos da colaboración entre o Concello de Santiago de Compostela e a **Asociación Gallega de Personas con Enfermedades Oncohematolóxicas (ASOTRAME GALICIA)** para o desenvolvemento do programa ***«Atención psicosocial para pacientes nun proceso oncohematolóxico e de transplante de medula ósea»***, así como establecer as condicións que rexerán a concesión da subvención nominativa destinada ao seu financiamento.

O programa ten como finalidade prestar atención integral ás persoas con enfermidades oncohematolóxicas e ás súas familias, mediante unha intervención psicolóxica e social especializada, co obxectivo de contribuír á mellora da súa calidade de vida, favorecer o afrontamento da enfermidade e reforzar o apoio durante o proceso asistencial.

As actuacións previstas neste convenio responden a fins de interese público e social no ámbito dos dereitos e dos servizos sociais, contribuíndo ao cumprimento dos obxectivos municipais de apoio ás persoas afectadas por enfermidades oncohematolóxicas e ás súas familias.

A subvención nominativa prevista nas Bases de Execución do Orzamento Xeral do Concello de Santiago de Compostela para o exercicio 2026, a favor da **Asociación Gallega de Personas con Enfermedades Oncohematolóxicas (ASOTRAME GALICIA)**, por importe de **3.000,00 € (TRES MIL EUROS)**, destinarase exclusivamente ao financiamento dos gastos subvencionables necesarios para a execución das actuacións previstas neste convenio durante o período de execución nel establecido, de conformidade co orzamento desagregado que figura como Anexo I.

As actuacións subvencionadas executaranse de conformidade cos principios de eficacia, eficiencia, economía, estabilidade orzamentaria, boa xestión financeira e responsabilidade na utilización dos fondos públicos, orientándose á consecución dos obxectivos e resultados previstos no proxecto presentado pola entidade beneficiaria.

A colaboración regulada neste convenio fundamenta a concesión directa da subvención na existencia dun interese público e social, atendendo á especialización e experiencia da **Asociación Gallega de Personas con Enfermedades Oncohematolóxicas (ASOTRAME GALICIA)** na atención e apoio ás persoas afectadas por enfermidades oncohematolóxicas e ás súas familias, mediante o desenvolvemento de actuacións complementarias ás promovidas polos servizos públicos no ámbito dos servizos sociais.

SEGUNDA.- CONTIDO.

DENOMINACIÓN DO PROGRAMA:

“ ATENCIÓN PSICOSOCIAL PARA PACIENTES NUN PROCESO ONCOHEMATOLÓXICO E DE TRANSPLANTE DE MÉDULA ÓSEA”

DESCRIPCIÓN DO PROXECTO / PROGRAMA

O programa consiste na prestación dunha atención integral dirixida a pacientes con enfermidades oncohematolóxicas e ás súas familias, combinando intervención psicolóxica e social especializada. Desenvolveranse dúas actividades principais: acompañamento emocional mediante sesións individuais de apoio psicolóxico, e atención social centrada na información, asesoramento e xestión de recursos e prestacións.

A finalidade é mellorar a calidade de vida das persoas beneficiarias, favorecendo a adaptación á enfermidade, reducindo o malestar emocional e incrementando a autonomía no ámbito social.

Estas accións permiten dar resposta ás necesidades detectadas: impacto emocional do diagnóstico, sobrecarga das persoas coidadoras e situacións de vulnerabilidade socioeconómica. A intervención contribúe a mellorar o benestar psicolóxico, o coñecemento de recursos e a capacidade de afrontamento, xerando un impacto positivo tanto nas persoas pacientes como no seu entorno.

OBXECTIVOS E PRIORIDADES:

Obxectivo Xeral:

- Mellorar a calidade de vida e a saúde emocional de pacientes oncohematolóxicos e as súas familias mediante unha intervención interdisciplinar.

Obxectivos Específicos:

- OE1. Aumentar o axuste e a adaptación de pacientes ó proceso oncohematolóxico no 60% da liña base en 9 meses.
- OE2. Elevar o nivel de autonomía de pacientes e familias no ámbito social, en 9 meses.
- OE3. Diminuír o nivel de estrés nun 65% das persoas coidadoras informais de pacientes, en 9 meses

ÁMBITO TERRITORIAL

O proxecto desenvolverase no concello de Santiago de Compostela, en distintos espazos de atención: a sede da asociación na Casa das Asociacións de Benestar Social, o Centro Sociocultural de Santa Marta e o Espazo Asociativo do CHUS.

PERSOAS DESTINATARIAS DAS ACTIVIDADES DO PROXECTO

Espéranse atender a un mínimo de 12 persoas afectadas dun cancro hematolóxico e familiares. Entre os pacientes, o perfil máis común son adultos de entre 30 e 75 anos, diagnosticados e tratados en hospitais públicos de referencia en Galicia.

Doutra banda, o proxecto tamén se enfoca nos familiares coidadores, cuxo perfil predominante son mulleres de entre 45 e 65 anos, que residen co paciente e son os seus familiares directos. Esta realidade reflicte roles de xénero tradicionais que asignan ás mulleres o papel de coidadoras principais. As persoas coidadoras a miúdo carecen de formación e habilidades para afrontar as implicacións do coidado, tanto para o paciente como para o seu propio benestar. Isto pode levar a subestimar as responsabilidades e a atrasar a procura de apoio psicolóxico, resultando en situacións de inestabilidade emocional. O proxecto busca abordar estas carencias, proporcionando apoio e recursos ás coidadoras para mellorar a súa calidade de vida e a do paciente.

As vías de acceso ao proxecto son principalmente dúas: os propios profesionais sanitarios, que tras anos de traballo conxunto no Complexo Hospitalario Universitario de Santiago de Compostela (CHUS) xa coñecen a nosa liña de traballo, e as redes sociais, web e prensa, dado que constitúe unha entidade especializada que traballa directamente con pacientes con este tipo de cancro.

IMPACTO PREVISTO NA COMUNIDADE DESTINATARIA DO PROXECTO, ASÍ COMO O EFECTO MULTIPLICADOR E O SEGUIMENTO

Os resultados que se espera acadar en relación os obxectivos propostos así como os instrumentos empregados para medir o grao de consecución serían:

-OE1 Aumentar o axuste e adaptación de pacientes ao proceso oncohematolóxico no 60% da liña base, en 9 meses.

-Mellora dos niveis de ansiedade e depresión medido co inventario de Ansiedade de Beck (BAI) e o inventario de depresión de Beck (BDI-2) en 6 persoas tras a intervención.

-Aumento entre o 30-40% na puntuación de benestar psicolóxico medido ca Escala de Calidade de Vida WHOQOL-BREF en 6 persoas despois de 9 meses de atención.

OE2 Elevar o nivel de autonomía de pacientes e familias no ámbito social, en 9 meses

-Aumento do número de pacientes e familias nun 70% que demostran coñecer mellor os recursos e servizos dispoñibles na comunidade. Estes datos se sacarán dos informes de seguimento e unha entrevista por parte da profesional.

OE3 Diminuír o nivel de estrés nun 65% das coidadoras informais de pacientes, en 9 meses.

-Diminución do nivel de estrés percibido nun 65%, medido ca Escala de Estrés Percibido (PSS) das persoas coidadoras.

-Consecución de 80% de grao de satisfacción cos recursos de apoio recibidos para a redución do estrés, avaliado por enquisas de satisfacción e entrevista das persoas coidadoras.

RECURSOS HUMANOS E MATERIAIS IMPLICADOS NA ORGANIZACIÓN DO PROXECTO

Recursos Humanos:

1 Psicóloga Sanitaria: con Máster en Neuropsicoloxía Clínica e Mestra en Educación Primaria, con 3 anos de experiencia no campo de atención a pacientes oncohematolóxicos.

-1 Traballadora social: con 4 anos de experiencia na atención a pacientes oncohematolóxicos. Conta con formación en materia de prestacións sociais e na abordaxe dos procesos de final de vida e xestión do duelo

-1 administrativa: con formación en recursos humanos.

Recursos Materiais:

- Material de difusión.

-2 ordenadores para garantir a posibilidade da atención online e o rexistro das atencións, así como a elaboración de informes

-2 teléfonos para realizar algunhas consultas e facer un seguimento da atención.

AVALIACIÓN DOS RESULTADOS

A avaliación dos resultados realizarase a través dunha avaliación procesual e participativa do programa de acompañamento integral para maximizar o seu impacto na calidade de vida e a saúde emocional das persoas beneficiarias.

Ao comezo, realízase unha avaliación exhaustiva utilizando cuestionarios, entrevistas, observación participante e a consulta dunha comisión de pacientes independente. Os achados dunha análise DAFO previo, que involucra a pacientes, familias, profesionais sanitarios e o equipo do proxecto, guían o deseño inicial do programa.

Aos seis meses, organízase un grupo focal cos beneficiarios para realizar unha avaliación formativa. Este grupo focal, permite identificar áreas de mellora e axustar a implementación do programa en tempo real, garantindo que as necesidades e perspectivas dos pacientes sexan tomadas en conta.

Ao final do programa, levase a cabo unha avaliación sumativa que inclúe enquisas de satisfacción, informes técnicos dos profesionais (realizados a partir dos datos obtidos cos instrumentos mencionados no apartado do impacto do proxecto) e sesións de reflexión nos grupos de apoio. Isto permite valorar o grao de consecución dos obxectivos, a satisfacción dos participantes e recompilar información valiosa para futuras melloras.

VISIBILIDADE AO PROXECTO E COMO SE VAI DIFUNDIR

O proxecto darase a coñecer a través Plan de comunicación no que se recollen as accións para dar a coñecer o traballo realizado.

Por unha banda, vía en liña, realízase a difusión a través da web, rrss, o blog e a newsletter. Doutra banda, vía off line, a través de medios de comunicación, asistencia a eventos con potenciais doantes de medula ósea e socios e presentando o traballo aos hospitais galegos.

Máis concretamente, para seguir dando a coñecer o proxecto, tanto a persoal sanitario como a pacientes e familias, entregaránselles cartaces e folletos en hospitais e centros de saúde e solicitarase a colocación dun QR nas habitacións de Hematoloxía do hospital. Ademais, a devandita difusión por parte do departamento de comunicación da entidade, tanto en redes como en prensa, incluírá o logo do Concello de Santiago

DATAS

O programa desenvolverase dende o 02 de xaneiro de 2026 ata o 30 de setembro de 2026

ACTIVIDADES QUE SE VAN DESENVOLVER NO PROGRAMA:

1. NOME DA ACTIVIDADE: ATENCIÓN PSICOSOCIAL A PACIENTES CON CANCRO HEMATOLÓXICO E AS SÚAS FAMILIAS

DESCRIPCIÓN. A actividade consiste na prestación de atención psicolóxica individualizada centrada en axudar a xestionar o impacto psicolóxico que ten o proceso oncohematolóxico, abordando aspectos como a ansiedade, a depresión, o medo, o estrés e os cambios na calidade de vida. Ademais, favorece o benestar emocional, promovendo a adaptación á enfermidade e o fortalecemento dos recursos psicosociais do paciente.

OBXECTIVO DESTA ACTIVIDADE:

- OE1. Aumentar o axuste e a adaptación de pacientes ó proceso oncohematolóxico no 60% da liña base en 9 meses
- OE3. Diminuír o nivel de estrés nun 65% das persoas coidadoras informais de pacientes, en 9 meses.

PERSOAS DESTINATARIAS DA ACTIVIDADE:

As persoas destinatarias de esta actividade son 12 pacientes con cancro hematolóxico ou familiares. Tal e como mencionabamos, o perfil máis común son adultos entre 30 e 75 anos. O proceso oncolóxico implica habitualmente un desgaste psicolóxico que se manifesta en cadros de ansiedade, depresión, medos existenciais e unha notable alteración do autoconcepto e o benestar emocional

LUGAR DE REALIZACIÓN:

- Centro Sede da asociación na Casa das Asociacións de Benestar Social (de luns a venres de 9:00h a 14.00h)
- Espazo de atención no Centro Sociocultural de Santa Marta (xoves de 9:30 a 13:30h)
- Espazo Asociativo do CHUS (tódolos venres de 11:00 a 14:00 h)

ACTIVIDADES DE PLANIFICACIÓN E EXECUCIÓN:

Planificación:

- Avaliación inicial de necesidades psicolóxicas

- Deseño de plans de intervención individualizados
- Organización de axendas e espazos de atención
- Coordinación con profesionais sociosanitarios
- Definición de indicadores de seguimento.

Execución:

- Sesións individuais de acompañamento emocional.
- Aplicación de técnicas de xestión emocional e redución do estrés
- Apoio na adaptación á enfermidade
- Atención a persoas coidadoras
- Seguimento e avaliación dos casos
- Rexistro e avaliación dos casos.

RECURSOS HUMANOS E MATERIAIS IMPLICADOS NA ORGANIZACIÓN DAS ACTIVIDADES:

Recursos Humanos:

- 1 psicóloga e 1 administrativa

Recursos materiais:

1 ordenador e 1 teléfono

DATAS (indicar meses no que comeza e termina a actividade):

Actividade desenvolverase dende o 02 de xaneiro de 2026 ata o 30 de setembro de 2026

2. NOME DA ACTIVIDADE: ATENCIÓN SOCIAL

DESCRIPCIÓN. A actividade consiste na prestación de atención social individualizada ás persoas con enfermidades oncohematolóxicas e ás súas familias está orientada a mitigar o impacto que a enfermidade ten en cada unha das esferas da persoa enferma e da súa contorna coidadora. Por tanto, a traballadora social realizará: apoio instrumental, centrado

nas necesidades materiais, realizando un acompañamento nos trámites e xestións das prestacións sociais dispoñibles (discapacidade, dependencia, etc.), información sobre a enfermidade e promoción de redes de apoio; valoración de dificultades e estratexias de afrontamento; e actuará en ocasións como sostén afectivo.

OBXECTIVO DESTA ACTIVIDADE: -OE2. Elevar o nivel de autonomía de pacientes e familias no ámbito social, en 9 meses.

PERSOAS DESTINATARIAS EXCLUSIVAMENTE DA ACTIVIDADE, E INDICARASE O SEU NÚMERO, A IDADE E AS CARACTERÍSTICAS DA POBOACIÓN:

As persoas destinatarias de esta actividade son 12 pacientes con cancro hematolóxico ou familiares. Tal e como mencionabamos, o perfil máis común son adultos entre 30 e 75 anos. A vulnerabilidade socioeconómica destes pacientes nace da confluencia de dous factores: a incapacidade para traballar debido á discapacidade orgánica e o aumento dos custos asociados á enfermidade. Se a isto lle sumamos o descoñecemento dos recursos sociais aos que teñen dereito, atopámonos cun perfil de usuario en alto risco de vulnerabilidade.

LUGAR DE REALIZACIÓN:

-Centro Sede da asociación na Casa das Asociacións de Benestar Social (de luns a venres de 9:00h a 14.00h)

-Espazo de atención no Centro Sociocultural de Santa Marta (xoves de 9:30 a 13:30h)

-Espazo Asociativo do CHUS (tódolos venres de 11:00 a 14:00 h)

ACTIVIDADES DE PLANIFICACIÓN E EXECUCIÓN:

Planificación:

-Avaliación da situación social e económica.

-Deseño de intervencións sociais individualizadas.

-Identificación de recursos e prestacións.

-Coordinación con servizos e entidades.

-Organización do seguimento dos casos.

Execución:

-Información e asesoramento sobre dereitos e recursos.

-Apoio na tramitación de prestacións.

-Acompañamento en xestións administrativas.

-Intervención ante situacións de vulnerabilidade.

-Fomento da autonomía e redes de apoio.

-Seguimento, rexistro e informes.

RECURSOS HUMANOS E MATERIAIS IMPLICADOS NA ORGANIZACIÓN DAS ACTIVIDADES:

Recursos Humanos:

- 1 traballadora social e 1 administrativa

Recursos materiais:

1 ordenador e 1 teléfono

DATAS (indicar meses no que comeza e termina a actividade):

Actividade desenvolverase dende o 02 de xaneiro de 2026 ata o 30 de setembro de 2026

TERCEIRA. CONTÍA DA AXUDA E CRÉDITO ORZAMENTARIO

Para a financiación das actuacións obxecto do presente convenio, o Concello de Santiago de Compostela achegará á **Asociación Gallega de Personas con Enfermedades Oncohematológicas (ASOTRAME GALICIA)** unha subvención nominativa por importe de **TRES MIL EUROS (3.000,00 €)**, con cargo á aplicación orzamentaria 020 23100 4800026 do Orzamento Xeral do Concello de Santiago de Compostela para o exercicio 2026, de conformidade co previsto nas Bases de Execución do Orzamento.

A presente subvención ten carácter nominativo e a súa concesión directa fundaméntase no disposto no artigo 22.2.a) da Lei 38/2003, do 17 de novembro, xeral de subvencións, ao estar prevista expresamente nas Bases de Execución do Orzamento Xeral do Concello de Santiago de Compostela para o exercicio 2026.

A subvención será compatible con outras subvencións, axudas, ingresos ou recursos destinados á mesma finalidade, procedentes de calquera administración ou entidade pública ou privada, nacional, da Unión Europea ou de organismos internacionais, sempre que o importe total das axudas percibidas non supere o custo da actividade subvencionada.

No suposto de que o custo efectivo da actividade subvencionada sexa inferior ao importe total das axudas percibidas, procederá o reintegro da contía que exceda do seu custo, de conformidade co disposto no artigo 32.2 do Regulamento da Lei xeral de subvencións.

CUARTA.GASTOS SUBVENCIONABLES.

Considéranse subvencionables os gastos realizados entre o **1 de xaneiro e o 30 de setembro de 2026** que de xeito indubidable respondan á natureza da actividade obxecto de subvención, incluíndo os efectuados antes da sinatura do convenio, tales como gastos de persoal, de profesionais, subministracións e servizos efectuados por provedores, etc.

En todo caso, deberá acreditarse de xeito fidedigno no xustificante de gasto que está directamente relacionado coa actividade e que está efectivamente pagado antes da data de finalización da vixencia do convenio.

4.1 GASTOS SUBVECCIONABLES:

A) GASTOS DE PERSOAL Poderán imputarse os gastos derivados da contratación de persoal necesario para a execución do proxecto, xa sexa con carácter fixo ou temporal, incluíndo salarios ou nóminas, cotizacións á Seguridade Social e retencións de IRPF.

En función da modalidade de prestación dos servizos, establécense as seguintes tipoloxías:

A.1) Persoal con contrato laboral. Deberá achegarse o correspondente

Contrato de traballo formalizado conforme á normativa laboral aplicable, no que consten, como mínimo, os seguintes extremos:

- Funcións e tarefas a desenvolver no marco do proxecto
- Modalidade contractual
- Categoría profesional
- Retribución
- Imputación de gastos

Nóminas: imputarase o importe total bruto devindicado correspondente ao persoal adscrito ao proxecto. Deberá achegarse a nómina e o xustificante bancario do seu aboamento debidamente dilixenciado pola entidade bancaria intermediaria do pagamento..

Seguridade Social (cota empresarial): será subvencionable a parte proporcional da cotización empresarial correspondente ao tempo efectivo de dedicación ao proxecto. Deberanse achegar os documentos de cotización á Seguridade Social (RLC e RNT) debidamente validados, correspondentes ao período de imputación, así como o xustificante do seu pagamento.

A achega correspondente á persoa traballadora enténdese incluída na nómina ao formar parte do salario bruto devindicado.

IRPF: deberá achegarse o modelo 111 correspondente ás retencións practicadas, xunto co seu xustificante de pagamento. Non se admite imputación adicional por este concepto, ao estar integrado no salario bruto.

Gastos non subvencionables

Non terán a consideración de gastos subvencionables os seguintes:

- Retribucións ou compensacións a persoas membros de xuntas directivas ou órganos de dirección polo desempeño do seu cargo, salvo as excepcións previstas na normativa aplicable.

- Penalizacións, indemnizacións ou recargas derivadas de incumprimentos contractuais imputables á entidade beneficiaria, incluíndo gastos por despedimento.

- Recargas por falta de pagamento ou pagamento fóra de prazo de obrigas tributarias ou coa Seguridade Social.

- Gastos derivados de contratacións ou prestacións de servizos realizados por membros da xunta directiva ou órganos de goberno da entidade.

- En ningún caso serán subvencionables facturas ou recibos emitidos por cargos directivos (Presidencia, Vicepresidencia, Secretaría, Tesouraría ou vogalías da Xunta Directiva) a favor da propia entidade.

- Unicamente serán admisibles relacións laborais ordinarias en réxime de persoal asalariado (por exemplo, traballador/a social, psicólogo/a ou persoal técnico), sempre que os cargos directivos non teñan carácter remunerado polo desempeño do seu cargo, circunstancia que deberá constar expresamente nos estatutos da entidade ou en acordo formal do órgano competente, así como no proxecto subvencionado.

A.2) Honorarios de profesionais externos. Poderán imputarse os honorarios de profesionais que desenvolvan funcións de execución directa do proxecto, tales como identificación de actuacións, seguimento, execución de actividades ou avaliación.

O persoal non vinculado laboralmente coa entidade poderá impartir talleres, conferencias ou actividades formativas sempre que concorran os requisitos de esporadicidade e non habitualidade da prestación.

Documentación xustificativa. Deberá achegarse:

-Factura desagregada do servizo prestado, con indicación expresa da actividade realizada, coas retencións de IRPF que procedan, así como o xustificante do seu pagamento.

-Copia do DNI da persoa prestadora do servizo.

-Modelo 111 e, se procede, modelo 190, acreditativo das retencións e ingresos á conta do IRPF, xunto cos seus correspondentes xustificantes de pagamento.

-Declaración responsable na que se faga constar o carácter esporádico da actividade e o cumprimento do requisito de non superación dos límites retributivos legalmente establecidos, no seu caso.

-En ningún caso serán subvencionables facturas ou recibos emitidos por membros da xunta directiva ou órganos de goberno da entidade (Presidencia, Vicepresidencia, Secretaría, Tesouraría ou vogalías), con cargo á subvención.

B) Alugueiro de inmobles. Establécese un límite máximo de imputación de gastos de alugueiro que, con carácter xeral, non poderá superar en ningún caso o 25 % do importe total da subvención concedida.

A dita limitación non será aplicable aos gastos derivados do arrendamento de vivendas destinadas á acollida de persoas en situación de vulnerabilidade social, sempre que quede acreditada a súa vinculación directa e exclusiva coa finalidade do proxecto.

En todo caso, só terán a consideración de custo directo subvencionable aqueles gastos de alugueiro correspondentes a espazos que se utilicen de forma efectiva, exclusiva e verificable para a execución das actividades incluídas no proxecto, quedando expresamente excluídos os usos compartidos non imputables ou non xustificables mediante criterios obxectivos de dedicación.

Tipoloxía de alugueiros subvencionables: Unicamente poderán imputarse os seguintes conceptos:

1. Alugueiro de oficinas ou locais destinados á realización directa das actividades do proxecto.

2. Alugueiro de espazos ou equipamentos necesarios para a execución das actividades (incluíndo, con carácter enunciativo e non limitativo, equipos de son, instalacións deportivas ou culturais, así como mobiliario e medios materiais necesarios).

Xustificación documental e requisitos fiscais:

-A imputación destes gastos requirirá, en todo caso, a achega de factura desagregada e xustificante de pagamento efectivo.

-No caso de alugueiro de locais ou oficinas, a factura deberá recoller de forma diferenciada o importe do alugueiro e o IVE, así como, se procede, as retencións fiscais legalmente aplicables.

En particular:

Cando o arrendador sexa persoa física suxeita a retención, a entidade beneficiaria estará obrigada a practicar e ingresar a correspondente retención de IRPF nos termos establecidos na normativa tributaria aplicable.

Cando o arrendador estea suxeito ao Imposto sobre Sociedades, practicarase a retención correspondente conforme á normativa fiscal vixente.

3. Arrendamento de local habitual

No caso de arrendamento de local habitual, será obrigatoria a achega da seguinte documentación:

- Contrato de arrendamento en vigor debidamente formalizado.
- Modelos tributarios 115 e 180 relativos a retencións por arrendamentos urbanos, xunto cos seus correspondentes xustificantes de ingreso.

C) SEGUROS VINCULADOS Á EXECUCIÓN DO PROXECTO. Serán subvencionables os gastos derivados da contratación de pólizas de seguro especificamente vinculadas á execución do proxecto ou actividade subvencionada, cando resulten necesarias para garantir a cobertura de persoas, bens ou actividades incluídas no seu desenvolvemento.

Neste concepto poderán incluírse, entre outros, os gastos correspondentes a seguros de responsabilidade civil e de accidentes que cubran os riscos derivados da realización das actuacións subvencionadas, tales como accións formativas, actividades grupais, visitas didácticas, eventos ou outras actuacións de natureza análoga.

Para a súa xustificación deberá achegarse a seguinte documentación:

- * Póliza de seguro subscrita.
- * Relación das persoas aseguradas ou, de ser o caso, acreditación do colectivo ou actividade obxecto da cobertura.
- * Factura emitida pola entidade aseguradora.
- * Xustificante acreditativo do pagamento efectivo da prima correspondente.

Só serán admisibles os gastos correspondentes ao período de execución da actividade subvencionada e na medida en que garden unha relación directa e necesaria coa súa realización.

D). MANTEMENTO E CONSERVACIÓN, MANTEMENTO E LIMPEZA. Terán a consideración de gastos subvencionables os derivados da conservación e mantemento ordinario de equipos, mobiliario, instalacións e demais elementos patrimoniais afectos ao desenvolvemento do proxecto, sempre que teñan por obxecto reparar deterioracións ou menoscabos ocasionados polo uso normal, o desgaste ordinario ou causas fortuítas, e non supoñan actuacións de ampliación, mellora estrutural ou incremento do valor do ben.

Así mesmo, poderán imputarse os gastos derivados dos servizos de limpeza dos locais e espazos empregados para a execución das actividades subvencionadas, sempre que garden unha relación directa coa súa realización.

Para a súa xustificación deberá achegarse a correspondente factura, suficientemente detallada, na que conste a natureza do servizo ou actuación realizada, así como o xustificante acreditativo do seu pagamento efectivo, de acordo coa forma de pagamento empregada.

E). MATERIAL FUNXIBLE E CONSUMIBLES. Terán a consideración de gastos subvencionables os correspondentes á adquisición de bens consumibles ou material funxible directamente vinculados á execución do proxecto, caracterizados por esgotarse co seu uso ou durante o desenvolvemento da actividade subvencionada.

Poderán imputarse, entre outros, os gastos derivados da adquisición de consumibles informáticos, material de oficina, material didáctico ou formativo e demais materiais necesarios para a correcta execución das actuacións previstas no proxecto.

Para a súa xustificación deberá achegarse a correspondente factura, suficientemente detallada, na que se identifiquen os bens adquiridos, así como o xustificante acreditativo do seu pagamento efectivo, de acordo coa forma de pagamento empregada.

F).- GASTOS DE SUBMINISTRACIÓNS.-Terán a consideración de gastos subvencionables os derivados de subministracións correntes non inventariables directamente vinculadas á execución do proxecto, tales como auga, electricidade, gas, telefonía, conexión a internet e outros servizos de natureza análoga.

Dado que este tipo de gastos adoitan estar asociados ao funcionamento xeral da entidade ou compartidos con outras actividades e proxectos, a súa imputación deberá realizarse de acordo con criterios obxectivos, proporcionais e verificables. Para tal efecto, a entidade beneficiaria deberá describir na documentación xustificativa os criterios de reparto empregados, as variables consideradas para a súa distribución e o cálculo realizado para determinar a porcentaxe imputada ao proxecto subvencionado.

En todo caso, deberán observarse as seguintes condicións:

* Unicamente serán subvencionables os gastos correspondentes a consumos realizados durante o período de execución do proxecto, de acordo co período de facturación que figure na correspondente factura.

* Os consumos deberán estar vinculados aos locais, instalacións ou actividades directamente afectos á realización do proxecto subvencionado.

* A imputación deberá gardar unha proporción razoable coa utilización efectiva dos recursos no desenvolvemento das actuacións subvencionadas.

Para a súa xustificación deberá achegarse a correspondente factura, así como o xustificante acreditativo do seu pagamento efectivo.

4.2.- GASTOS NON SUBVENCIONABLES:

Non terán a consideración de gastos subvencionables os seguintes:

- a) Os gastos financeiros, gastos bancarios, licenzas, taxas e tributos de calquera natureza.
- b) O Imposto sobre o Valor Engadido (IVE), cando sexa susceptible de recuperación, compensación ou dedución pola entidade beneficiaria.
- c) Para os efectos da acreditación do carácter non recuperable do IVE, a entidade deberá presentar certificación expedida pola Axencia Estatal de Administración Tributaria acreditativa de non estar dada de alta no Imposto sobre o Valor Engadido ou de non presentar declaracións correspondentes a este imposto. Alternativamente, poderá achegar o modelo oficial de resumo anual do IVE que acredite a inexistencia de operacións que dean dereito á súa dedución ou compensación, de conformidade coa normativa tributaria aplicable.
- d) Os gastos de investimento, entendendo por tales os destinados á creación, adquisición, ampliación ou mellora de infraestruturas, instalacións ou bens de natureza inventariable, así como aqueles que teñan carácter amortizable.

En particular, non serán subvencionables a adquisición de equipos informáticos, impresoras, mobiliario, equipamentos audiovisuais, cámaras fotográficas, dispositivos electrónicos, dominios de internet ou outros bens de natureza análoga.

- e) Os investimentos destinados á construción, ampliación ou reforma de instalacións e ao equipamento permanente das mesmas.

f) As gratificacións, compensacións ou percepcións económicas abonadas ás persoas voluntarias da entidade.

g) Os gastos de desprazamento, manutención e aloxamento do persoal vinculado ao proxecto, incluídas as persoas voluntarias e os membros dos órganos de goberno da entidade, salvo que se estableza expresamente o contrario nas condicións reguladoras da subvención.

h) Os xuros debedores, recargas por demora, sancións administrativas, penais ou tributarias, así como os gastos derivados de procedementos xudiciais.

i) Os gastos derivados da participación dos membros da entidade nos seus órganos de goberno, representación ou dirección.

j) Os gastos destinados á promoción institucional da entidade beneficiaria que non garden relación directa co obxecto, finalidade ou actividades do proxecto subvencionado.

k) Os gastos de asesoramento xurídico, fiscal, laboral ou financeiro, así como os gastos notariais e rexistrals.

l) Os gastos de restauración, cátering, recepcións, degustacións culinarias ou conceptos análogos.

Exceptúanse os gastos destinados á adquisición de ingredientes alimentarios e bebidas non alcohólicas cando estean expresamente previstos no orzamento aprobado e garden unha relación directa coa execución das actividades subvencionadas.

m) As primas correspondentes a seguros de vehículos titularidade da entidade beneficiaria.

n) Calquera outro gasto que, aínda non estando expresamente excluído nos apartados anteriores, non garde unha relación directa e indubidable coa execución do proxecto subvencionado ou non figure previsto na memoria e orzamento aprobados.

o) Os gastos realizados fóra do período de execución establecido para a actividade subvencionada, salvo autorización

QUINTA. VIXENCIA E EXTINCIÓN DO CONVENIO

O presente convenio producirá efectos desde a data da súa sinatura e manterá a súa vixencia ata o 31 de decembro de 2026.

Sen prexuízo do anterior, terán a consideración de gastos subvencionables aqueles que respondan de maneira indubidable á natureza e finalidade da subvención, sempre que fosen realizados entre o 1 de xaneiro de 2026 e o 30 de setembro de 2026, e se atopen debidamente xustificadas de conformidade co establecido neste convenio e na normativa aplicable.

Non se prevé a posibilidade de prorrogar a vixencia do presente convenio.

O convenio extinguirase polo cumprimento das actuacións que constitúen o seu obxecto ou por incorrer nalgunha das causas de resolución previstas no artigo 51 da Lei 40/2015, do 1 de outubro, de réxime xurídico do sector público, así como polas seguintes causas específicas:

a) O incumprimento total ou parcial das obrigas, condicións ou compromisos asumidos por calquera das partes e, en particular, dos previstos neste convenio.

b) A aplicación total ou parcial dos fondos percibidos a finalidades distintas das que fundamentan a concesión da subvención.

c) A falta de presentación da xustificación, a súa presentación fóra de prazo ou a insuficiente acreditación dos gastos subvencionables, nos termos previstos neste convenio e na normativa de aplicación.

d) A concorrencia de calquera das causas de reintegro previstas nos artigos 36 e 37 da Lei 38/2003, do 17 de novembro, xeral de subvencións, e nos artigos 32 e seguintes da Lei 9/2007, do 13 de xuño, de subvencións de Galicia.

Nos supostos anteriores, procederá, segundo a natureza e o alcance do incumprimento, o reintegro total ou parcial das cantidades percibidas, xunto cos xuros de demora correspondentes, calculados desde a data do pagamento da subvención ata aquela en que se acorde a procedencia do reintegro, de conformidade coa normativa subvencional aplicable.

A resolución do convenio non eximirá ás partes do cumprimento das obrigas pendentes que, pola súa natureza, deban subsistir tras a súa extinción. Así mesmo, adoptaranse as medidas

necesarias para garantir a correcta finalización das actuacións en curso ou, de ser o caso, a súa liquidación ordenada, preservando os dereitos e intereses das persoas destinatarias das actuacións desenvolvidas ao abeiro deste convenio.

No suposto de extinción anticipada, a entidade beneficiaria deberá presentar a conta xustificativa correspondente aos gastos realizados con cargo á subvención no prazo máximo de UN MES contados desde a data de efectos da resolución. Unha vez examinada a documentación presentada, o Concello poderá iniciar, de ser o caso, o procedemento de reintegro respecto das cantidades non xustificadas, non executadas ou aplicadas a finalidades distintas das previstas neste convenio.

SEXTA. FORMA DE PAGAMENTO E XUSTIFICACIÓN

O aboamento da subvención realizarase unha vez acreditado o cumprimento da finalidade que fundamenta a súa concesión e xustificada a realización da actividade subvencionada, así como a efectiva aplicación dos fondos aos gastos obxecto deste convenio.

Con carácter previo ao pagamento, o órgano competente poderá realizar as actuacións de comprobación que considere oportunas para verificar a adecuada execución das actividades subvencionadas e a correcta aplicación dos fondos públicos.

Cando o custo finalmente executado resulte inferior ao orzamento inicialmente previsto, a contía da subvención minorarase proporcionalmente, sempre que a redución do gasto non comporte un incumprimento da finalidade nin unha execución deficiente das actuacións subvencionadas.

A entidade beneficiaria deberá presentar a documentación xustificativa, como data límite, o 30 de setembro de 2026, que en todo caso deberá incluír todos os gastos e ingresos da actividade, sen que poidan nin deban excluírse ningún recurso (propio ou alleo) que o financie nin ningún gasto da actividade aínda que os gastos totais sexan superiores á subvención .achegando, a seguinte documentación:

1. **Orzamento desagregado** onde consten os custos estimados dos conceptos para os cales se solicita a subvención que forma parte do convenio á data da súa sinatura

2. Unha **Memoria de actuación das actividades realizadas** no proxecto xustificativa do cumprimento das obrigas contraídas, con indicación das actividades realizadas e dos resultados obtidos. Deberase xuntar á memoria unha reportaxe fotográfica ou audiovisual que reflicta o desenvolvemento das actividades, así como unha mostra dos carteis empregados. Ademais, indicaranse as páxinas web e/ou redes sociais utilizadas para a súa difusión pública e, de ser o caso, achegarase a referencia das aparicións do proxecto nos medios de comunicación social.

3. **Declaración responsable asinada pola/o titular ou pola/o representante legal da entidade de ter cumprido o obxecto do convenio.**

4. **Relación detallada do conxunto de todas as subvencións ou axudas solicitadas**, concedidas ou percibidas doutros axentes para mesma finalidade, que se acreditará mediante Declaración responsable, asinada pola/o titular ou pola/o representante legal da entidade. No suposto de que as actividades fosen financiadas, ademais de por este convenio, con fondos propios, outras subvencións ou recursos, deberá acreditarse na xustificación o importe, a procedencia e a aplicación dos ditos fondos ás actividades subvencionadas. En ningún caso, a contía da subvención, só ou en concorrencia con outras subvencións, axudas doutras administracións, entes públicos ou privados, poderá superar a totalidade do custo da actividade que vai desenvolver a entidade beneficiaria.

5. **Relación detallada das facturas** (nas que deberá constar concepto, número de factura, data de expedición, data de pagamento, provedor e ordénante) e nóminas ou documentos xustificativos que se presentan para a xustificación asinada pola/o titular ou pola/o representante legal da entidade, desagregadas por conceptos consonte o orzamento presentado pola entidade.

6. Unha **Memoria Económica xustificativa do custo das actividades** que terá o contido do artigo 72 do Real Decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, Xeneral de Subvencións, en que se reflicta a vinculación detallada de cada gasto executado co proxecto subvencionado. Deberá quedar acreditado que cada gasto que se xustifique é totalmente necesario para a realización do proxecto, e deberá quedar vinculado a unha actividade ou actuación concreta dentro deste.

7. A XUSTIFICACIÓN DOCUMENTAL DO GASTO A entidade beneficiaria deberá acreditar a aplicación dos fondos percibidos á finalidade para a que foi concedida a subvención mediante a presentación da correspondente conta xustificativa, integrada pola documentación que se detalla a continuación.

7.1. Xustificación dos gastos mediante facturas e documentos equivalentes

Os gastos realizados con cargo ao proxecto ou actividade subvencionada deberán acreditarse mediante facturas emitidas durante o período subvencionable ou mediante documentos de valor probatorio equivalente con validez no tráfico xurídico mercantil ou eficacia administrativa.

As facturas deberán cumprir os requisitos establecidos no Real Decreto 1619/2012, do 30 de novembro, polo que se aproba o Regulamento das obrigas de facturación, así como, de ser o caso, as especialidades previstas na normativa tributaria aplicable.

Cando a normativa permita a expedición de factura simplificada, esta deberá reunir os requisitos mínimos establecidos no artigo 7 do citado Regulamento.

En todo caso, as facturas deberán figurar emitidas a nome da entidade beneficiaria, facendo constar a súa denominación social e o correspondente Número de Identificación Fiscal (NIF).

A acreditación do pagamento realizarase mediante documentos bancarios que permitan verificar de forma indubidable a efectiva saída de fondos, tales como transferencias bancarias, certificacións bancarias, xustificantes de ingreso ou documentos equivalentes. Estes deberán identificar, cando menos:

1. A persoa ou entidade ordenante do pagamento.
2. A persoa ou entidade beneficiaria do cobramento.
3. O importe abonado.
4. A data da operación.
5. O concepto ou referencia que permita vincular o pagamento coa factura correspondente.
6. Selo bancario acreditativo da operación conformada

Cando un mesmo pagamento comprenda varias facturas, estas deberán quedar perfectamente identificadas no correspondente xustificante bancario ou mediante documento complementario.

No caso de pagamentos anticipados, a factura deberá incorporar expresamente a mención «pagamento anticipado» ou equivalente, facendo constar a data de percepción do importe cando sexa distinta da data de expedición da factura.

Excepcionalmente admitirase a xustificación de gastos pagados en efectivo cando, pola súa natureza, non resulte posible ou habitual a utilización doutros medios de pagamento. Nestes supostos deberá constar na factura ou documento acreditativo a expresión «pagado» ou «recibín», acompañada da sinatura da persoa ou entidade provedora, a data do pagamento e o selo da empresa, de ser o caso.

Ademais, a entidade beneficiaria deberá achegar declaración responsable acreditativa de que o pagamento foi realizado integramente con fondos propios da entidade.

O importe máximo admisible mediante pagamento en efectivo será de 600 euros por factura, non admitíndose en ningún caso o fraccionamento artificial dun gasto coa finalidade de eludir este límite.

7.2. **Xustificación dos gastos de persoal**. Cando se imputen gastos de persoal á subvención, deberá achegarse a seguinte documentación:

a) Copia dos contratos de traballo do persoal adscrito ao desenvolvemento do programa ou actividade subvencionada.

No caso de que as funcións efectivamente desempeñadas non coincidan coa categoría profesional recollida no contrato, deberá achegarse ademais currículo profesional e documentación acreditativa da formación ou cualificación habilitante para o desempeño das tarefas imputadas ao proxecto.

b) Certificación emitida pola entidade beneficiaria, asinada pola persoa representante legal e pola persoa traballadora afectada, na que se detalle o número de horas efectivamente dedicadas ao proxecto.

c) Nóminas correspondentes ao período subvencionable, acompañadas dos respectivos xustificantes bancarios do seu pagamento.

d) Documentos RLC e RNT (Recibo de Liquidación de Cotizacións e Relación Nominal de Traballadores), debidamente validados pola Tesourería Xeral da Seguridade Social, así como os correspondentes xustificantes de pagamento.

e) Modelos de retención do IRPF (modelo 111 e, de ser o caso, modelo 190) e xustificantes acreditativos do seu ingreso.

f) Certificación emitida pola entidade beneficiaria acreditativa dos custos empresariais imputados ao proxecto, incluíndo as cotizacións á Seguridade Social correspondentes.

g) Declaración responsable da persoa representante legal da entidade acreditando que o persoal cuxos custos se imputan desenvolveu efectivamente actuacións vinculadas ao proxecto subvencionado.

Unicamente serán imputables os custos de Seguridade Social e as retencións de IRPF correspondentes ás persoas traballadoras e aos períodos temporais efectivamente imputados ao proxecto.

Non serán subvencionables as retencións tributarias nin as cotizacións sociais que sexan obxecto de aprazamento ou fraccionamento concedido pola Administración competente.

Cando a documentación laboral, fiscal ou de Seguridade Social sexa emitida electronicamente, deberá acompañarse dunha declaración responsable sobre a súa autenticidade.

7.3. Formas de acreditación do pagamento. Os gastos subvencionables deberán acreditarse mediante algunha das seguintes modalidades de pagamento:

a) **Transferencia bancaria** Con carácter preferente, os pagamentos realizaranse mediante transferencia bancaria. Deberá achegarse o correspondente resgardo ou xustificante bancario debidamente selado pola entidade bancaria, no que consten a data da operación, o importe, o ordenante, o beneficiario e a referencia da factura ou concepto satisfeito.

b) **Cheque nominativo.** Deberá achegarse copia do cheque emitido e certificación bancaria acreditativa do seu cargo efectivo, na que figure o número do cheque, a data de cobramento e a identificación da persoa ou entidade beneficiaria.

c) **Pagamento en efectivo.** Só se admitirá nos supostos excepcionais previstos no apartado 7.1 e dentro dos límites establecidos.

d) **Tarxeta bancaria.** No caso de pagamentos realizados mediante tarxeta de crédito ou débito, deberá acreditarse a titularidade da mesma, que deberá corresponder á entidade beneficiaria, así como a vinculación coa conta bancaria da entidade.

e) **Titularidade da conta bancaria.** Cando dos documentos bancarios non resulte posible verificar a titularidade da conta desde a que se realiza o pagamento, a entidade beneficiaria deberá achegar certificación bancaria acreditativa da titularidade. Na súa falta, o gasto considerárase non xustificado.

8. Certificados de estar ao corrente no cumprimento das súas obrigas tributarias (da Axencia Tributaria e da Dirección Xeral de Tributos da CCAA, e da Tesourería do Concello de Santiago) e Certificación de estar ao corrente no cumprimento das súas obrigas coa Seguridade Social.

9. Achegar o **nº de identificación fiscal** e nº de conta bancaria na que facer o ingreso.

10. Xustificación por parte da entidade beneficiaria de ter dado a adecuada publicidade do carácter público do financiamento dos programas e actividades obxecto do presente convenio, de xeito que se inclúa, en todo o material de divulgación das actividades obxecto desta axuda, a referencia de que están subvencionadas pola Concellería de Dereitos e Servizos Sociais mediante a inclusión da imaxe corporativa do Concello de Santiago. As entidades beneficiarias deberán acreditar na xustificación, mediante unha reportaxe fotográfica ou audiovisual que reflecta o desenvolvemento das actividades, así como unha mostra dos carteis empregados.

Ademais, indicaranse as páxinas web e/ou redes sociais utilizadas para a súa difusión pública e, de ser o caso, achegarase a referencia das aparicións do proxecto nos medios de comunicación social para o cumprimento da obriga de información e publicidade do financiamento público da acción subvencionada de conformidade co estipulado na cláusula

oitava do presente convenio, polo que a tal efecto deberan presentar Declaración responsable asinada pola/o titular ou pola/o representante legal da entidade de ter cumprido con este requisito e, achegar os soportes documentais a que fai referencia a referida cláusula.

Se, para realizar o obxecto do presente convenio a entidade beneficiaria obtivese subvencións doutras entidades públicas ou privadas que, en concorrencia coa concedida superara o total do custo da actividade, minorarase a achega do Concello de Santiago, e procederá o reintegro do exceso obtido sobre o custo da actividade subvencionada, así como o interese de demora correspondente.

No caso de que a xustificación fose incorrecta e/ou incompleta, requirirase a entidade para que corrixa os erros ou defectos observados e/ou achegue os documentos solicitados no prazo de dez días, advertíndolle que, de non facelo, se procederá, logo de resolución, á revogación da subvención e, de ser o caso, ao reintegro da contía percibida e á exixencia dos xuros de demora.

O Concello resérvase o dereito a comprobar, polos medios que estime oportunos, que a xustificación é correcta. Por tanto, a beneficiaria quedará obrigada a facilitar tanta información requíralle o servizo xestor, a Intervención Xeral e os órganos competentes para a censura de contas.

SÉTIMA. PRESENTACIÓN DA DOCUMENTACIÓN XUSTIFICATIVA

A documentación xustificativa da subvención presentarase a través do Rexistro Xeral do Concello de Santiago de Compostela ou por calquera dos medios previstos na normativa reguladora do procedemento administrativo común.

A entidade beneficiaria utilizará obrigatoriamente os modelos normalizados (ANEXOS) aprobados polo Concello e dispoñibles na sede electrónica municipal, que deberán presentarse debidamente cumprimentados, sen emendas nin alteracións que poidan comprometer a súa validez.

Así mesmo, e coa finalidade de facilitar a comprobación técnica e económica da subvención, a entidade remitirá, dentro do mesmo prazo establecido para a súa presentación no Rexistro, copia da documentación xustificativa en formato electrónico editable (.doc ou .docx) ao enderezo de correo electrónico habilitado pola Concellería de Dereitos e Servizos Sociais.

A remisión da documentación por correo electrónico terá carácter complementario e non substituirá, en ningún caso, a súa presentación polos medios legalmente establecidos.

OITAVA. OBRIGAS DA ENTIDADE BENEFICIARIA

Ademais das obrigas previstas no artigo 14 da Lei 38/2003, do 17 de novembro, xeral de subvencións; no artigo 11 da Lei 9/2007, do 13 de xuño, de subvencións de Galicia; e demais normativa de aplicación, a entidade beneficiaria comprométese a:

- a) Executar as actuacións que constitúen o obxecto do presente convenio nos termos previstos nel.
- b) Aplicar integramente os fondos recibidos á finalidade para a que foron concedidos.
- c) Xustificar, nos prazos e coa documentación establecida neste convenio, o cumprimento da finalidade da subvención e a aplicación dos fondos percibidos.
- d) Someterse ás actuacións de comprobación, seguimento, inspección e control financeiro que poidan realizar o Concello de Santiago de Compostela, a Intervención Xeral Municipal e os demais órganos de control competentes, facilitando canta información lles sexa requirida.
- e) Comunicar ao Concello a obtención doutras subvencións, ingresos ou recursos destinados á mesma finalidade, tan pronto como se coñeza a súa concesión e, en todo caso, antes da presentación da xustificación.
- f) Acreditar o cumprimento das obrigas tributarias e fronte á Seguridade Social nos supostos previstos legalmente.
- g) Manter unha contabilidade separada ou un sistema de codificación contable adecuado que permita identificar claramente as operacións financiadas con cargo ao presente convenio.
- h) Conservar a documentación xustificativa durante o prazo legalmente establecido, para os efectos das actuacións de comprobación e control.
- i) Dar cumprimento ás obrigas de publicidade do financiamento público nos termos establecidos na cláusula novena.

j) Proceder ao reintegro dos fondos percibidos nos supostos previstos na normativa de subvencións e neste convenio.

k) Asumir en exclusiva a organización, execución e responsabilidade das actividades subvencionadas, sen que a sinatura do presente convenio xere relación laboral, funcional ou de calquera outra natureza entre o Concello e o persoal, persoas voluntarias ou colaboradoras da entidade beneficiaria, que manterá indemne ao Concello fronte a calquera reclamación derivada da súa actuación.

NOVENA. PUBLICIDADE DO FINANCIAMENTO

A entidade beneficiaria deberá dar a adecuada publicidade do carácter público do financiamento en todas as actuacións que deriven da execución do proxecto, en cumprimento do artigo 18.4 da Lei 38/2003, do 17 de novembro, xeral de subvencións e 31 do Real Decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, Xeral de Subvencións, así como do artigo 15.3º da Lei 9/2007, do 13 de xuño, de subvencións de Galicia e 20 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

En concreto, deberán facer constar, na súa publicidade ou na información que xeren en relación co proxecto ou actividade subvencionada, o financiamento do/s programa/s ou actividade/s obxecto do presente convenio, con fondos do Excmo. Concello de Santiago a través da Concellería de Dereitos e Servizos Sociais. Para isto, no lugar onde se realicen as actuacións a que se refire a actividade ou programa obxecto desta subvención, deberá figurar, de forma visible, un cartel informativo en que apareza a imaxe corporativa do Concello de Santiago coa lenda de obrigada inclusión de que dito programa ou actividade esta financiada polo mesmo, en aplicación do disposto na normativa. Cando o proxecto teña publicidade nun sitio da internet deberán figurar na súa páxina de inicio e en lugar visible as citadas referencias; cando se materialice nunha aplicación informática deberán facerse as citadas referencias na zona de inicio ou menú principal da aplicación informática, así como na epígrafe de información da aplicación (axuda, acerca de ou similares). Cando o proxecto dea lugar a documentación (manuais, cadernos, enquisas, folletos, notas informativas, CD-Rom) deberán constar na dita documentación as citadas referencias, que se colocarán na contraportada no caso das publicacións.

En todo caso deberá realizarse por parte da Entidade beneficiaria reportaxe fotográfica ou audiovisual que reflecta o desenvolvemento das actividades, así como unha mostra dos carteis empregados os efectos da xustificación do cumprimento deste requisito.

Asemade, a Lei 15/2014, de 16 de setembro, de racionalización do sector público e outras medidas de reforma administrativa modifica o réxime xurídico da Base de Datos Nacional de Subvencións (BDNS) contido no artigo 20 da Lei 38/2003, de 17 de novembro, Xeral de Subvencións e establece que a partir do 1 de xaneiro de 2016 serán de aplicación as disposicións que en materia de publicidade se recollen no apartado 20.8 e as correlativas dos artigos 17.3.b), 18 e 23.2, sinalándose no apartado 20.8 que convocar unha subvención sen seguir o procedemento indicado na propia lei será causa de anulabilidade da convocatoria.

Correlativamente, a Resolución de 10 de decembro de 2015, da Intervención Xeral da Administración do Estado, pola que se regula o proceso de rexistro e publicación de convocatorias de subvencións e axudas no Sistema Nacional de Publicidade de Subvencións (BOE Nº 299, de 15 de decembro de 2015), no seu apartado Terceiro.1 sinala que as bases reguladoras aprobaranse e publicaranse de acordo co réxime que en cada Administración teña establecido para a eficacia das disposicións administrativas, rexendo con carácter xeral o réxime aplicable recollido no artigo 37 da Lei 39/2015, de 1 de outubro, do Procedemento Administrativo Común das Administracións Públicas.

Na mesma resolución, no seu apartado Cuarto, régulase o fornecemento de información da convocatoria á BDNS:

1. A información será fornecida polos órganos xestores. Dentro de cada órgano deberán establecerse os mecanismos que garantan que a convocatoria e o extracto que se fornecen á BDNS foron aprobados nos mesmos termos pola autoridade competente.

2. O órgano xestor fornecerá á BDNS en todo caso:

- a) O texto da convocatoria na lingua española oficial do Estado.
- b) O texto do extracto da convocatoria na lingua española oficial do Estado.
- c) Os datos estruturados da convocatoria, na lingua española oficial do Estado. Entre eles figurará o diario oficial no que deba publicarse o extracto.

Ademais, poderá incluír:

- d) Os mesmos textos da convocatoria e do extracto nunha segunda lingua oficial.
- e) Outros documentos, como formularios de solicitude, instrucións de cumprimento, documentos de axuda e información, etc., que contribúan aos fins de publicidade e transparencia facilitando o seu acceso aos posibles interesados.

DÉCIMA. PROTECCIÓN DE DATOS, TRANSPARENCIA E BO GOBERNO

A entidade beneficiaria será a única responsable dos tratamentos de datos persoais que leve a cabo con ocasión da execución do presente convenio, comprometéndose ao cumprimento do disposto no Regulamento (UE) 2016/679, do Parlamento Europeo e do Consello, do 27 de abril de 2016, na Lei orgánica 3/2018, do 5 de decembro, de protección de datos persoais e garantía dos dereitos dixitais, así como na restante normativa que resulte de aplicación.

Así mesmo, comprométese a cumprir as obrigas de publicidade activa, transparencia, subministración de información e bo goberno previstas na Lei 19/2013, do 9 de decembro, de transparencia, acceso á información pública e bo goberno, na Lei 1/2016, do 18 de xaneiro, de transparencia e bo goberno de Galicia, e demais normativa aplicable, facilitando ao Concello a información que resulte necesaria para o cumprimento destas obrigas.

UNDÉCIMA. SEGUIMIENTO, INTERPRETACIÓN E AVALIACIÓN DO CONVENIO

Co fin de garantir o adecuado desenvolvemento e cumprimento do presente convenio, constituirase unha comisión de seguimento, integrada por representantes do Concello de Santiago de Compostela e da entidade beneficiaria, designados polas respectivas partes.

Corresponderá á comisión:

- a) Realizar o seguimento da execución das actuacións previstas no convenio.
- b) Resolver, mediante acordo, as dúbidas de interpretación que poidan suscitarse durante a súa aplicación.

c) Propoñer, se é o caso, as medidas necesarias para garantir o adecuado cumprimento dos obxectivos previstos.

As funcións da comisión terán carácter de seguimento e coordinación e non poderán supoñer modificación das condicións esenciais do convenio nin das obrigas asumidas polas partes.

O Concello de Santiago de Compostela poderá, en calquera momento, realizar actuacións de comprobación e seguimento das actividades subvencionadas, co fin de verificar a súa correcta execución e a adecuada aplicación dos fondos públicos.

DUODÉCIMA. INCUMPRIMENTO, REINTEGRO E RÉXIME SANCIONADOR

O incumprimento das obrigas establecidas neste convenio ou na normativa reguladora das subvencións dará lugar, segundo a natureza e alcance do incumprimento, á perda total ou parcial do dereito ao cobramento da subvención ou á obriga de reintegrar as cantidades percibidas, xunto cos correspondentes xuros de demora, de conformidade co disposto na Lei 38/2003, do 17 de novembro, xeral de subvencións, na Lei 9/2007, do 13 de xuño, de subvencións de Galicia, e na súa normativa de desenvolvemento.

O procedemento de reintegro tramitarase con suxeición aos principios de audiencia da entidade interesada, contradición e demais garantías previstas na lexislación administrativa.

Á entidade beneficiaria resultarlle de aplicación o réxime de infraccións e sancións previsto no Título IV da Lei 9/2007, do 13 de xuño, de subvencións de Galicia, así como na restante normativa que resulte de aplicación.

DÉCIMOTERCEIRA. RESPONSABILIDADE

A organización, dirección e execución das actuacións obxecto deste convenio corresponderán exclusivamente á entidade beneficiaria, que asumirá íntegramente as responsabilidades de carácter civil, laboral, administrativo ou de calquera outra natureza derivadas do seu desenvolvemento.

A sinatura do presente convenio non implicará, en ningún caso, a existencia de relación laboral, funcionarial ou contractual entre o Concello de Santiago de Compostela e o persoal, persoas voluntarias ou colaboradoras da entidade beneficiaria.

En consecuencia, a entidade beneficiaria manterá indemne ao Concello fronte a calquera reclamación, responsabilidade ou indemnización que poida derivarse da execución das actividades subvencionadas.

DECIMOCUARTA. NATUREZA XURÍDICA E XURISDICIÓN COMPETENTE

O presente convenio ten natureza administrativa e queda excluído do ámbito de aplicación da Lei 9/2017, do 8 de novembro, de contratos do sector público, ao abeiro do disposto no seu artigo 6.

O seu réxime xurídico rexerase polo establecido nas súas propias cláusulas e, no non previsto nelas, polo disposto na Lei 38/2003, do 17 de novembro, xeral de subvencións; na Lei 9/2007, do 13 de xuño, de subvencións de Galicia; na Lei 40/2015, do 1 de outubro, de réxime xurídico do sector público; na lexislación de réxime local e demais disposicións que resulten de aplicación.

As cuestións litixiosas que poidan xurdir respecto da interpretación, modificación, efectos, cumprimento ou extinción do presente convenio e que non poidan resolverse no seo da comisión de seguimento serán resoltas polo órgano municipal competente, esgotando a vía administrativa.

Contra a correspondente resolución poderá interpoñerse recurso contencioso-administrativo perante o Xulgado do Contencioso-Administrativo de Santiago de Compostela, nos prazos e termos previstos na Lei 29/1998, do 13 de xullo, reguladora da xurisdición contencioso-administrativa.

E, en proba de conformidade, ámbalas dúas partes asinan este convenio e os seus anexos por duplicado, no lugar e na data sinalados no encabezamento.

Dona María Rozas Pérez Concelleira de Dereitos e Servizos Sociais, Promoción Económica e Xuventude	Dona Asociación Gallega de Personas con Enfermedades Oncohematológicas (ASOTRAME GALICIA)

ANEXO I

ORZAMENTO DESAGREGADO ONDE CONSTAN OS CUSTOS ESTIMADOS DOS CONCEPTOS DO PROXECTO/ACTIVIDADE OBXECTO DO CONVENIO E PARA OS CALES SE SOLICITA A SUBVENCIÓN

ACTIVIDADE/PROGRAMA: Programa de Atención psicosocial para paciente nun proceso oncohematolóxico e de transplantes de médula ósea

CONCEPTOS	ORZAMENTO 2026
PERSOAL	2.324,42 €
GASTOS PROFESONAIS (Comunicación)	170,58 €
MATERIAIS E OUTROS GASTOS XERAIS IMPUTABLES DIRECTAMENTE AO PROXECTO (Materiais informativos)	100,00 €
OUTROS GASTOS	405,00 €
TOTAL	3.000,00 €

Conforme ao Regulamento (UE) 2016/679 do Parlamento Europeo e do Consello, de 27 de abril de 2016, relativo á Protección das Persoas Físicas, así como na Lei Orgánica 3/2018, de 5 de decembro, de protección de datos persoais e garantía de dereitos dixitais, no que respecta ao tratamento de datos de carácter persoal, infórmase de que os datos persoais recollidos no presente convenio e nos seus anexos, incorporaranse a un ficheiro para o seu tratamento, coa finalidade de poder atender os compromisos xerados pola relación que mantemos con esta entidade. Así mesmo, informámoslle que pode exercer os dereitos de acceso, rectificación, supresión, limitación, oposición e portabilidade e revocar este consentimento, segundo o previsto na lei mediante un escrito dirixido ó Excmo. Concello de Santiago de Compostela como responsable do ficheiro.

LEXISLACIÓN APLICABLE: Orzamento Xeral do Excmo. Concello de Santiago de Compostela para o ano 2026 e Bases de execución do Orzamento Xeral do Excmo. Concello de Santiago para o ano 2026, Lei 38/2003, do 17 de novembro, xeral de subvencións; o Real decreto 887/2006, do 21 de xullo, polo que se aproba o seu regulamento; a Lei 9/2007, do 13 de xuño, de subvencións de Galicia; e o Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.